quello fece. Or fo scrito per colegio a Nona, dolersi di questo, et volesse ubedir i rectori di Zara, come suo' superiori.

Di Sibinico, di sier Vetor Bragadim, conte, di 5. Come à per via di uno dil conte Xarco, gran hoste di turchi esser partita per Friol.

Et fo balotà monition mandade a Nona, o, per dir meio, a Zara, et ducati 200; quali fo mandadi per la galia, soracomito sier Sabastian Marcelo.

Da Roma vene letere di sier Polo Capelo, el cavalier, orator, di 9. Come fo dal papa, e li mostrò li sumarij; li disse è im pericolo. La colpa è di malli christiani. Item, parlato di Spagna, soa santità disse: Speremo l'armata anderà a conzonzersi con quella di la Signoria. Item, eri, ricevute letere di do, con li sumarij di Fiorenza, fo dal papa e li comunichò. Qual disse: Fiorentini stanno mal, nil mirum. Item, l' orator yspano li havia parlato; voria do cosse da la Signoria per nome di soy reali: la prima, la Signoria non potesse venir a pace col turco, senza saputa di quelle majestà ; l'altra, andando l'armada turchescha ne la Sicilia, la Signoria nostra fusse ubligata darli socorsso. Item, l'orator di Franza, è in streta praticha col papa, di novi capitoli, di ajutarsi l'uno a l'altro: videlicet il papa, a l'impresa dil Reame, il re; et il re, a l'impresa di Romagna, il papa. Et che quel zorno era intrato li sier Marin Zorzi, doctor, successor suo; li andò contra etc.

Del dito orator, di X. Come le zente d'arme si aproximava a Roma, per far la massa e venir in Romagna. Item, prega la Signoria li pagi li danari trati da Sandro, perchè non si pol lassa' i arzenti im pegno etc. Et fo balotato ditte letere, qual fono prese di esser satisfate, che fina hora non si avia voluto.

Di sier Marin Zorzi, doctor, orator nostro, di 9. Come era zonto li a Roma, li vene contra mia 4 l'orator nostro e li prelati, poi le fameie di li cardinali, li oratori, excepto Spagna, qual si mandò a scusar. Venendo, il pontifice mandò per lui, poi la fameia dil papa. L'audientia era stà deputata doman, tamen poi il papa li mandò a dir non poteva, per convenir esser con il cardinal Orssini et altri.

Da Messina, di Francesco Floriam, doctor, mandatario nostro, di 24. Come à solicità continue il gran capetanio, qual die noctuque non restava poner in hordine l'armata, e dar danari. À fato le mostre; à belle fantarie, niun italian, solum spagnoli, englesi e todeschi. Item, à asoldà una barza di uno neapolitano, con homeni italiani suso. Item, à persone 13 milia, l'à confortà a mandar prima una parte versso Levante, e poi andar col resto, per poter esser al

socorsso di Modon. Rispose el gran capetanio: Saremo tutti mercore in nave, e nui si partiremo poi venere. Non li par di divider l'armada. *Item*, voria uno salvo conduto per alcuni contumazi, è su la sua armada, da la Signoria nostra. Rispose esso Francesco, il capetanio zeneral faria il tutto; e cussì à scrito a dito capetanio. Poi li disse: Che porto aremo, posito che non se pigliesemo qualche porto de l'inimico? Rispose: Qual soa signoria volesse, l'aria. Disse non sta ben spagnoli con italiani. *Item*, si provedi di vino. Conclude, sarano velle 90, e partirà prestissimo.

Del ditto, ivi, di 28. Come fin quel zorno l'armata non era partita; le zente è poste sopra li navilij; dice monterà luni in la carachia grande il gran capetanio, dove è 1000 homeni suso, che sarà a di 31 avosto; e à fato porta' le robe li in nave di esso Florian. Item, à conduto Zuan Tomaso, neapolitano, corsaro infesto di la Signoria nostra, vol salvo conduto. Li à risposto: Chi è con sua signoria, non li bisogna salvo conduto. Item, soliciterà, come fa continue.

Di Napoli, di l' orator, di ultimo. Come eri, ricevute nostre letere, fo dal re, e li dimandò la trata de' salnitrij dil regno. Soa majestà rispose: Quella illustrissima Signoria pol far de questo regno, come dil suo proprio; et ordinò le letere per miera 200, che fo quanto richiese. Item, di l'armada yspana, 0 intende; è fama sia per partirssi; à mandato lì a far fanti, e il re li manda domino Dyonisio Asmodeo, fo una altra volta. Item, dimanda licentia di repatriar; è mexi 21 fuora, e à trato ducati 700 a usura, a do 1/2 al mese de interesse per cento, à impegnato li arzenti e veste; non ha più letere di fede, et non si trova a la fede di la Signoria, sì che non sa come viver.

Di Rimano, di Marco Antonio Zambon, secretario, di 13. Come il signor stava pur con la febre, e la signora, il fiol et domino Renaldo. Li populi comenzano a tumultuar; poi sono romagnoli, sì che è in gran pericolo. Lui non sa che far, voria saper etc.

Di Cadore, di sier Zuan Navaier, capetanio, di 12. Come era capità li alcuni stratioti, stati a Mantoa, andavano a la ventura in Elemagna; li à ritenuti; havea letera patente dil marchexe preditto. Li fo rescrito li dovesse lassar andar etc.

In questa matina, fo parlato in colegio zercha feni e biave per la Patria di Friul, et provisionati over fanti, quello si ha a far.

Item, andamo nui, savij ai ordeni, a la procura-

313